

Date – 08/12/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Larsap General (Retd) Vijay Kumar Singh-a'n Mizo thalaiten Indian Armed Forces zawm turin theihna leh chakna an ngah tih sawiin Mizo sipai hmingthate hnungzui ve turin a chah.
2. Tunhnaia Indigo thlawhtheihna engemawzat khaih lak avanga khualzin tam takin harsatna an tawh tihziaawm nan Northeast Frontier Railway chuan Sairang leh Guwahati inkara tlan rel-ah coach pahnih a dah belh a, tunkar ningani atangin special train 2 a tlan tir dawn bawk.
3. Mizoram sorkar, kohhran leh tlawmngai pawlte'n ruihhlo do beihpui an thlak mek karah kumin hian kum 21 hnua ruihhlo vanga thi an tam ber tum a thleng.
4. Goa-a nizana lamna hmun pakhata kangmei chhuakah mi 25 an thi.



CM : ARECA NUT

Chief Minister Pu Lalduhoma'n Rengdil khuaa Kuhva Kût a hmanpui na ah an sawrkar tirh phat atangin kuhva tawlh rûk titâwp turin hma an la a ti a, Mizoram chanchina kuhva rate that ber kum a thleng tih a sawi.

Vawiina Rengdil Sports Centre-a Rengdil khuaa Kuhva chingtute leh Land Resources, Soil & Water Conservation Department tangkawpin Kuhva Kut an buatsaih hmanpuitu Chief Minister chuan Kuhva chingtuten kuminah rate tha taka Kuhva an hralh chu a lawmpui thu sawiin an sawrkar tirh atangin kuhva tawlh ruk ti tawp turin theihtawp an chhuah tih sawiin hemi rahchhuah chu Kuminah Mizoram chanchina Kuhva rate that ber kum a thleng tih a sawi.

Rengdilah hian chhungkaw 480 vel khawsa mekin, Kuhva huan an nei deuh vek a. Chief Minister sawi danin kuhva chu a hralhna a that phawt chuan ram ei leh bar zawna siamthat kawngah a thawhhlawk hle dawn a ti a, Sawrkar flagship programme Bana Kaih hnuaiah Kuhva huan siam ve theih ani tih sawiin a hralhna tha a awm theih nan theihtawp an chhuah mek a ti a, NEC sum cheng Vbc 7.43 hmangin Kuhva Processing Plant Zamuangah leh Chemphaiah an din mek tih asawiin a chingtute mamawh a tahtawla ngaihtuah zel a ni dawn tih a sawi.

Minister Pu Lalthansanga pawhin thusawiin, Hachhek bial chuan Kuhva an tuanpui zel theih nan, kuhva tawlhruk do kawngah leh kuhva huan enkawlna

kawngah tan lak a ngai a ti a, an hmasawna tur hrang hrangah sawrkar chu inhawng taka an awm reng tur thu a sawi a ni.



CM RUBBER MISSION

Chief Minister Pu Lalduhoma'n Rubber chin chu tlangram lo neih bansan a, eizawna ngelnghet neih nan a tha tih sawiin Ramngaw chereu zel tur ven nan bakah lei chung hang luangral tur venna atan leh tuihna humhalhna atan a tangkai hle tih a sawi.

Vawiina Chuhvel Rubber chingtute zau panna kawng a hawna ah he thu hi sawiin Pu Lalduhoma chuan kum 5 chhungin Hectare 11,500 a zauah Rubber chin khah vek an tum dawn a ti a, rubber chin chu eizawna nghet neih nana tha anih avang leh ramngaw chereu tur venna atana thil tha tak anih avangin a tangkai hle a ti a, CM Rubber Mission hnuaiah rubber phun belh chauh ni lovin, a chingtute tana hamthatna leh Rubber sawngbawlina hmanrua leh Plantation link road bakah marketing thlenga ngaihtuhsak tur an ni tih a sawi.

Chuhvelah hian CM Rubber Missions phase 1 hnuaiah in 80 an awm a, kumin July thlaah kha chhungkaw tinin rubber kung 450 theuh an dawng a. A phunna lama an mamawh tinrenga hmanah cheng 40320 an dawng nghal a. Kumin November-ah khan 2nd instalment cheng 20160 an dawng leh a ni.



FCS&CA MINISTER

FCS&CA Minister Pu B. Lalchhanzova'n nikum atanga Buhfai sem bang tihral thin tihtawp a nih tak avangin buhfai quintal sing 5 chuang an hum thei a, thla 3 chhung buhfai a manto a lei a ngai dawn lo tih a sawi.

Vawiin khan I&PR Minister B. Lalchhanzova hovin ZPM Media department chuan Mizoramah sorkarna an siam kum hnihna champha pualin Aizawl Press Club-ah thuthar thehdarhtute an kawm a, kum 2 chhunga ZPM kaihhruai sorkar hnuaia department hrang hrang hmalakna sawiin heng zingah hian FCS&CA department hmalakna sawiin, Minister chuan nikum 2024 March thla atanga Buhfai sem bang tihral thin tihtawp a nih tak avangin kum khatah buhfai quintal 50,000 chuang, Cheng vaibelchhe 20 chuang an hum theiah an inngai a ti a, tun dinhmuna Mizoramin buhfai chhekkhawl a neih that chhan pawh buhfai bo thlau an venhim vangah an ngai tih a sawi a, hetiang zat an hum theih avang hian thla thum chhung, tun thla December thleng hian a man to, Open Market Procurement atangin buhfai an lei thin chu lei ngai lovin an awm theih a rin thu a sawi a, tunah hian buhfai quintal 1,20,000 aia tam stock an nei tih a sawi bawk a ni.

Byte: Minister B. Lalchhanzova

Minister chuan nikum November thla atang khan retailer te lawmman tihpun a ni tih sawiin, buk dik taka mipuiten buhfai an lak theih nan Godown tinah Digital Weighing scale dah vek tura hmalak mek a nih thu leh an dah zawh tep tawh thu a sawi a, Online-a Ration Card siamthar dil theihna pawh peih fel tep a nih thu sawiin hei hi Mizoram bik chauh nilovin, India ram pum intawm a nih avangin duh anga

hmanhmawh theih a nih loh thu a sawi bawk a ni. Hei bakah hian Minister chuan ZPM kaihhruai sawrkar Flagship program - MAMB hnuai Thlai Thar lei, Handholding Loan, leh CM Special Package hnuai mipuite tana hamthatna hrang hrang chhawpchuah ani a ti bawk.

<><><>

BRO PROJECT

Defence Minister Rajnath Singh-an Border Roads Organisation (BRO) hnuai project 125 a hmalakna tur a hawnah Mizoram chhunga kawngpui leh lei siam na tur a tel.

Defence Minister Rajnath Singh hian nimin khan D-S-DBO Road, Ladakh-ah video conferencing in heng hmalakna turte hi a hawng a. Ramri hnaih state leh Union Territory hrang hranga leilung chhengchhe tak tak karah thiamna sang zawk leh remhriatna hmangin kawngpui 28, lei 93 leh a dang 4 siam a ni ang.

Hawna hun hi Mizoram atangin Lok Sabha MP Pu Richard Vanlalhmangaiha, Rajya Sabha MP Pu K. Vanlalvena leh Chief Engineer, Project Pushpak (GREF) Rajeev Dua-ten biak hmuhtheihna kaltlangin an chhim a. Heng project 125 zingah hian Project Pushpak, Aizawl hnuai thawh tur pathum telin Zawlingling-Mawhre-Sapi inkar kawngpui siamna tur te, Tuichanglui lei siamna tur leh Gausan lei siamna tur te a tel a ni.

<><><>

LADC COUNTING

Lai Autonomous District Council inthlana vote tla te chu naktuk zing dar 8 atangin Government Lawngtlai College a Counting Hall ah chhiar a ni dawn a. Vote chhiar turin inbuatsaihna engkim peih fel a ni tawh.

Vote tlate hi Counting Hall-a pindan pathuma dawhkan 21 ah chhiar a ni dawn a, Tuichhaklam Sangau RD Block huamchhunga MDC bial 9 chu Pindan pakhat ah dawhkan 5 ah chhiar a ni dawn a, Lawngtlai leh a chhehvel bial 8 awmin dawhkan 8 ah chhiar a ni anga, Tuithlanglam bial 8 chu dawhkan 8 ah chhiar ani dawn a ni.

Ruahmanlawk dan chuan tumkhat ah Pindan pathumah bial 3 zel chhiar a ni dawn a, Pindan pakhat ah bial khat chu vawikhat chhiar ah zawhfel nghal zel a ni ang.

LADC inthlanah hian Vote za zela 83.99% a tla a ni.

<><><>

ZMC

Zoram Medical College & Hospital post graduate (specialist) a seat 10 chu state quota leh All India quota in seat awm zatve ve ve an insem.

ZMC&H-a specialist zir theih turte hi subject 5- Paediatrics (MD), General Surgery (MS), General Medicine (MD), Obstetrics & Gynaecology (MS) leh Anaesthesiology (MD)-ah te seat 2 theuh a ni dawn a, state quota leh All India quota

chuan seat awm zatve ve ve hi an insem a, zaa 50 chu Mizoram quota niin, zaa 50 dang chu All India quota a ni dawn thung a. Akashvani Aizawl zawhna chhangin, ZMC&H Director Zoramthara Zadeng chuan Mizoram quota seat 5 zing a seat 2- Anaesthesiology (MD) leh General Medicine [MD] chu In-service category niin Mizoram a doctor tang lai te tan a ni a ti a, seat 3 dang-Paediatrics (MD), General Surgery (MS), Obstetrics leh Gynaecology [MS] chu Open Category a ni a, National eligibility cum entrance test (NEET) PG Entrance exam a ti tha Mizote'n an chang thung dawn tih sawiin, Mizoram sorkar Higher & Technical Department kaltlangin lak an ni dawn a ti a, ZMC&H a PG zir tum te hian kumthar January ni 15 atang khian an zawm tan theih a rin thu a sawi a, a bul tanna atan hian department 5 chauh nimahse zawimuangin department dang te pawh hawn belh zel tum a nih thu leh nakkum lamah seat awmzat pawh tih belh tum a ni thu Akashvani Aizawl a hrih a ni.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

LOK SABHA

Vawiin Lok Sabha inkhawmah national song Vande Mataram kum 150 na pualin special discussion neih a ni. He hla hi Bankim Chandra Chatterjeea'n kum 1875 a a phuah a ni a. Sawihona bultantu Prime Minister Narendra Modia chuan Vande Mataram thuken chuan ramchhungah chakna leh fuihna mipuite a pek thu leh zalenna sual kawngah a ti chak thar a ni a ti a. National song chuan vawiin thlengin mipuite thilungah thu ala sawi a, an beisei tihhlawhtling turin a la nawr kal reng a ni a ti. Pu Modia chuan vawiina Vande Mataram hlutna hre reng tura sawihona hun tha House Member ten an nei chu vanneihna anih thu sawiin ramchhung mipuite tan pawh malsawmna anih thu a sawi bawk a ni. Pu Modia chuan Vande Mataram kum 150 na chuan hmanlai ram ropuina a kaitho thar leh tih sawiin ram zalenna sual kawngah khan he hla hian nghawng thui tak a neih thu a sawi bawk a ni.

<><><>

POVERTY

Sawrkar laipui chuan kil hrang hrang atanga rethei tehna chu a tlahniam tih a sawi. Lok sabha-a zawhna chhangin Union minister of State of Finance Pankaj Chaudhary chuan kum 2013-14 ah multidimensional poverty chu zaa 29.17 anih lain kum 2022-23 ah chuan zaa 11.28 ah a tla hniam tawh a ti a. Mi vaibelchhe 24.8 vel chu hemi chhung hian retheihna ata khaichhuah an ni a ti a. Worl Bank Report taralngin Union Minister Chaudhary chuan ramchhunga rethei zualte chu kum 2011-12 ah zaa 27.12 atangin zaa 5.25 ah a tlahniam tawh a ti bawk.

<><><>